

Nowodhow an Seythen

15 / 07 / 08

Seythen fest bysi o dhe Gernow. Dy Sadorn yw passyes yth esa synsys orth Kingsley Village, Dydh an Chartra. An hwarvos ma veu restrys yn kov an kevambos res dhe'n stenoryon nans yw pypm kans bledhen.

Yth esa keskerdh, ilow ha dons restrys dhe'n worvarhas dhe Frosynn. Dhe les yw godhvos bos koffiji an tyller ma egor dhyn rag hwarvosow erel.

**

Y teuth Dug ha Duges a Gernow omma dy Yow ha Dy Gwener. Charles ha Camilla eth a-dro lies le kepar ha Dindajel, Aberfal ha Bosvenegh. Hag i dhe Aberfal... an kopel a henwis kaybal nowyth ynter an dre ha Lannvoweseth.

**

Dy Gwener o dydh a vysyt aral... y teuth dhe Gernow skeus-chancellor George Osborne. Ev eth a-dro dhe Gernow yn unn dhyski a'n materyow a-vri dhe'n bobel... kepar ha gwitha gonisow kanker dhe glavji Trelesk, ha fatel wra kost a betrol agan gorra yn studh drog.

**

Hag ena... yth esa presentyans an piwas Holyer An Gov yn Truru. Lies huni a wrug dos war-barth dhe lyverji Waterstones nos Meurth ha gweles piwasow res dhe dhyloryon ha skriforyon gans Bardh Meur Vanessa Beeman.

An kynsa klass o an moyha a-les dhe Gernowegoryon awos bos piwas rag lyver y'gan taves, po a-dro dhe'gan taves. Kannas an Bardh Meur Mick Paynter a bresentyas an piwas. Ev a dhalathas yn unn gewsel a-dro dhe'n ombroforyon...

<clip>

Ha'n lyver neb a wrug seweni y'n kynsa klass o Bewnans Ke.. ha henn o pareusys gans Pennskol Karesk.

Henn yw oll rag an seythen ma... my a wra agas gweles nessa seythen.